

ALAM WANITA

PAKAIAN GADIS

Pada kali ini ibu Naimah, menghuraikan lebih lanjut tentang soal pakaian kaum wanita, dengan berpandukan hukum Islam yang telah ditetapkan oleh Allah ‘azza wa jalla di dalam *al-Qu’rān al-Karīm* al- dan dijelaskan oleh Rasul-Nya di dalam *al-hadīth al-sharīf*.

Adapun tentang pakaian gadis, Islam tidak sekali-kali menentukan tentang corak dan warnanya, hanya yang diberatkan ialah tentang had-hadnya. Gadis yang telah cukup umur, diwajibkan memakai tudung kepala dan menutupi semua anggota badannya di hadapan lelaki yang bukan muhrimnya, yakni lelaki yang ia halal berkahwin dengannya. Anggota badannya yang boleh terlihat itu, ialah muka dan dua tangannya hingga pergelangan sahaja, lebih dari itu tidak dibenarkan.

Mengenai soal itu saya sajikan suatu hadis diriwayatkan oleh Abu Daud, *maḍmun*-nya:

“Aisyah berkata: Bahawasanya Asma’ binti Abi Bakar pernah datang mengadap Nabi (SAW) dengan memakai pakaian nipis (jarang), Nabi pun berpaling daripadanya sambil bersabda: “ Hai Asma’! Sesungguhnya seorang perempuan apabila telah cukup umur, tidak boleh dilihat daripadanya melainkan ini dan ini,” sambil baginda mengisyaratkan kepada muka dan dua tangannya – hingga pergelangan.”

Dalam riwayat ini diterangkan bagaimana had perenggan pakaian yang mesti dipakai oleh gadis yang telah cukup umur ketika ia berhadapan dengan lelaki yang bukan muhrimnya;

anggota badan mesti tertutup semuanya kecuali muka dan dua tangannya hingga pergelangan, dan tidak dibenarkan dia memakai pakaian nipis yang menjadikan nampak jelas anggota badannya.

Adapun pakaian gadis dalam rumahtangganya sendiri tentulah tidak sebagaimana pakaian di luar rumah. Di dalam rumahnya ia boleh memperlihatkan perhiasannya kepada ayah dan saudara-saudaranya, tegas kepada muhrimnya dan juga kepada hambanya kerana diriwayatkan oleh Abu Daud, *maḍmunnya*:

“Anas berkata: Bahawasanya Nabi (SAW) pernah beri kepada Fatimah (puterinya) seorang hamba (lelaki), sedang Fatimah berpakaian yang apabila ia tutup kepalanya, terbuka kakinya. Dan apabila ia tutup kepalanya, terbuka kepalanya. Tatkala Nabi melihat keadaan itu, baginda bersabda. “Tidak mengapa, kerana dia itu tidak lain melainkan bapamu dan hambamu.”

Tentang gadis wajib memakai tudung kepala, adalah tegas dinyatakan oleh Tuhan ‘azza wa jalla di dalam *al-Qu’rān al-Karīm*, firman-Nya:

Wa lā yubḍīna zīnatahunna illā mā zahara minhā walyaḍribna bi khumurihinna ‘alā juyūbihinna.

Ertinya: “Janganlah perempuan-perempuan menampakkan perhiasan mereka melainkan apa yang zahir sahaja, dan hendaklah mereka hulurkan tudung kepala mereka di atas dada mereka”. (31, *al-Nūr*)

Perhiasan yang zahir itu ialah muka, celak, inai dan cincin, demikianlah menurut yang ditafsirkan oleh Ibnu Abbas.

Maksud hulurkan tudung kepala di atas dada perempuan itu, yakni hujung tudung kepala itu hendaklah mereka belitkan di leher mereka dan hulurkan di atas dada mereka, supaya dada itu tertutup. Selain daripada ayat Quran itu ada lagi beberapa hadis yang menerangkan wajibnya perempuan memakai tudung kepala.

Oleh sebab tegas wajibnya perempuan memakai tudung kepala, maka di antara sahabat-sahabat, tabiin, imam-imam mujtahid dan ahli-ahli tafsir tidak ada yang berpendapat, boleh terbuka kepala perempuan di hadapan lelaki asing.

Orang yang mengatakan tidak wajib perempuan memakai tudung kepala itu teranglah salahnya. Boleh jadi juga ia tahu wajibnya, tetapi sengaja diputar-putar supaya sesuai dengan fatwanya yang telah terlanjur mengatakan, tidak wajib perempuan bertudung kepala. Oleh sebab itu, bukan sedikit perempuan-perempuan, terutama gadis-gadis yang tidak tahu keterangan agama, bertaklid kepada fatwanya, sehingga berani mereka melepaskan tudung kepala.

Setelah ia lemah berhadapan dengan dalil Quran dan hadis yang menegaskan wajibnya, lalu ia cari-cari dalil akal, yang pada pandangannya sepintas lalu, boleh juga mengaburi mata orang.

Di bawah ini saya bawakan beberapa alasan akal yang dibuat-buat oleh mereka yang terlanjur berfatwa dan oleh perempuan-perempuan yang enggan memakai tudung kepala, bagi menolak wajibnya perempuan bertudung kepala, bersama bantahan dari beberapa penulis Muslim sejati. Gadis-gadis boleh timbang sendiri dan memilih, manakah alasan yang

berdasar kebenaran dan yang palsu, manakah keterangan yang boleh dijadikan pegangan dan mana yang tidak.

1). Tudung kepala itu gunanya bagi menjaga kehormatan, kalau seorang perempuan sudah merasa menjaga kehormatannya, jadi tudung kepala itu tidak mustahak lagi baginya.

Bantahannya:

Agama tidak tegaskan, gunanya tudung kepala itu bagi menjaga kehormatan perempuan; yang demikian hanya timbul dari fikiran sahaja. Kalau semua kewajipan dalam agama mahu dielakkan dengan cara yang tersebut, nescaya semua kewajipan boleh lepas orang mengerjakannya. Misalnya sembahyang itu bagi mengingat Allah, adakah kalau seseorang telah mengingat Allah, sudah tidak wajib lagi ia mengerjakan sembahyang? Demikian pula halnya puasa untuk berbakti, adakah kalau seseorang sudah berbakti tidak wajib lagi ia berpuasa? Tentu tidak. Oleh sebab itu, ‘illah (sebab) buatan tadi, tidak menjadi alasan bagi melepaskan seseorang dari mengerjakan kewajibannya!”

2). Tudung kepala itu asalnya dari bangsa Greek, bukan dari perintah Islam.

Bantahannya:

Tentang mengatakan tudung kepala bukan dari perintah Islam, sebenarnya satu kekeliruan yang sangat besar, kerana ayat Quran dan hadis sangat tegas menerangkan perempuan wajib bertudung kepala. Sekalipun asalnya dari orang Jahilliyah umpamanya kalau agama Islam sudah ditetapkan wajibnya, maka perempuan yang mengaku beragama Islam wajib turut, tidak boleh membantah apa-apa. Tetapi kalau tidak mahu mengerjakan kewajipan itu, ada lain perkara. Itu sudah terserah kepada dirinya sendiri.

Kalau boleh berdalil seperti itu, maka saya hendak bertanya: Bolehkah seorang sembahyang tidak menuju

Kaabah, dengan alasan Kaabah itu bekas tempat menaruh berhala?

3). Biar zahir tidak bertudung kepala, asalkan batin bertudung seratus peratus dengan roh iman dan Islam.

Bantahannya:

Bagaimana seorang perempuan boleh dipercayai batinnya telah bertudung dengan roh iman dan Islam, pada hal perintah Islam dan iman yang menyuruh dia bertudung kepala ia tidak kerjakan? Patutkah seorang perempuan yang telah meninggalkan satu perintah Islam dikatakan mempunyai roh Islam dan iman seratus peratus? Tentu tidak! Bahkan yang disifatkan beriman seratus peratus ialah perempuan yang mengerjakan perintah Islam, Walaupun yang sekecil-kecilnya.

4). Dengan memakai tudung kepala, kalau mahu jahat, ia jadikan jahat; oleh sebab itu tidak mustahak memakai tudung kepala.

Bantahannya:

Betul, kalau mahu, tetapi perempuan yang tidak memakai tudung kepala sudah terang jahatnya, oleh sebab ia telah melanggar perintah Allah yang mewajibkan dia memakai tudung kepala. Orang yang berdalil seperti ini, baik dimajukan beberapa dalil kepadanya:

1. Gadis-gadis yang bersekolah, banyak yang jahat, adakah kerana itu tidak mustahak gadis-gadis diberikan pelajaran?

2. Gadis-gadis yang dijaga dengan sopan, kalau mahu jahat; ia jadi jahat, oleh kerana itu tidak mustahak gadis-gadis dijaga dengan sopan?

3. Gadis-gadis yang tidak berbaju, banyak yang baik; adakah kerana itu boleh dibiarkan sahaja gadis-gadis bertelanjang atau memakai pakaian setengah telanjang.

5). Kalau tudung kepala itu wajib, mengapakah perempuan-perempuan Islam banyak yang tidak memakainya?

Bantahannya:

Walaupun perempuan Islam sedunia tidak bertudung kepala, tidak menjadi sebab bagi bolehnya melepaskan tudung. Adakah kerana banyaknya perempuan Islam yang menjadi gundik orang kafir, menjadi sebab bagi halalnya berzina? Tentu tidak. Maka demikianlah juga halnya bertudung kepala

6). Benteng tudung tidak lebih kekuatannya dari benteng rasa kebatinan yang suci.

Bantahannya:

Benteng wang tidak melebihi kekuatan dari benteng makanan, adakah kerana ada kata-kata yang demikian, boleh ditinggalkan mencari wang untuk membeli makanan? Tentu tidak! Maka begitulah juga tentang tudung kepala. Semata-mata bertudung kepala itu, saya akui tidak ada manfaatnya, dan tak dapat menjauhkan pemakainya daripada kejahatan. Yang berguna itu ialah memakai tudung kepala kerana menjunjung perintah Allah *'azza wa jalla*.

Memang besar gunanya seorang gadis menjunjung di atas kepalanya satu perintah agamanya yang tiap-tiap waktu mengatakan dia yang ia seorang Muslimah yang wajib menjaga kehormatannya.

Masih banyak lagi alasan-alasan fikiran yang dikemukakan orang bagi menolak wajibnya perempuan bertudung kepala, yang semuanya hampir tidak keluar maksudnya dari apa yang saya telah terangkan di atas tadi. Oleh sebab semua alasan itu dari fikiran, maka fikiran pula yang mesti membantahnya. Keterangan Quran dan hadis tidak dapat ditolak dengan alasan fikiran, walaupun fikiran siapa jua, tetapi menolaknya mesti dengan Quran dan hadis yang lebih kuat daripada itu

Oleh kerana tidak ada keterangan Quran dan hadis yang membolehkan perempuan membuka tudung kepala, maka tetaplah tiap-tiap perempuan yang mengaku beragama Islam, terutama gadis-gadisnya yang telah cukup umur, wajib bertudung kepala di hadapan lelaki yang bukan muhrimnya.